

<p>Ayat-ayat yang secara zahirnya menampilkan (semacam ada) pertentangan antara satu sama lain, perlulah dipakai dengan ma`na dan keadaan yang sesuai dan selayak dengan masing-masing daripadanya.</p>	<p>الآيَاتُ الَّتِي تُؤْهِمُ التَّعَارُضَ يُحْمَلُ كُلُّ نَوْعٍ مِنْهَا عَلَى مَا يَلِيقُ بِهِ وَيُنَاسِبُ الْمَقَامَ، كُلٌّ بِحَسَبِهِ</p>	<p>قاعدة 39</p>
---	---	-----------------

Lihat bagaimana ayat di bawah ini kelihatan bertentangan dengan beberapa ayat yang akan dikemukakan selepasnya:

فَيَوْمَئِذٍ لَا يُسْأَلُ عَنْ ذَنْبِهِ إِنْسٌ وَلَا جَانٌّ ﴿٣٩﴾

Maksudnya: Pada masa itu tiada sesiapa pun, sama ada manusia atau jin yang akan ditanya tentang dosanya. (ar-Rahman:39).

Ayat ke-39 Surah ar-Rahman ini menunjukkan tiada sesiapa pun, sama ada manusia atau jin yang akan ditanya tentang dosanya di akhirat nanti. Sedangkan jika dilihat kepada sekian banyak ayat yang lain pula jelas menunjukkan akan ada soal jawab di akhirat nanti. Sebagai contohnya lihat saja ayat-ayat berikut:

وَقَفُّوهُمْ إِنَّهُمْ مَسْئُولُونَ ﴿٤٠﴾

Bermaksud: Dan tahanlah mereka (di tempat perhentian), kerana sesungguhnya mereka akan ditanya. (as-Shaaffaat:24).

وَيَوْمَ يُنَادِيهِمْ فَيَقُولُ مَاذَا أَجَبْتُمُ الْمُرْسَلِينَ ﴿٦٥﴾

Bermaksud: Dan pada hari (kiamat itu) Allah menyeru mereka lalu bertanya: Apa jawab kamu kepada Rasul-rasul yang diutus kepada kamu dahulu? (al-Qashash:65).

وَقِيلَ لَهُمْ أَنِينَ مَا كُنتُمْ تَعْبُدُونَ ﴿٩٢﴾

Bermaksud: dan dikatakan kepada mereka: “Mana dia benda-benda yang kamu sembah dahulu?” (asy-Syu`araa’:92).

Tiga ayat ini jelas menunjukkan akan ada soal jawab dan pertanyaan kepada manusia atau jin di akhirat nanti. Kalau begitu bukankah sudah ada pertentangan antara tiga

ayat ini dengan ayat ke-39 Surah ar-Rahman tadi?

Jawabnya ialah memang sepintas lalu kelihatan semacam ada pertentangan antaranya. Akan tetapi jika dipakai kedua kelompok ayat-ayat itu dengan ma'na dan keadaan yang sesuai dan selayak dengan masing-masing daripadanya, niscaya akan hilanglah pertentangannya. Misalnya dikatakan, ayat-ayat yang mengatakan ada soal jawab dan pertanyaan di akhirat itu ialah soalan dan pertanyaan yang berbentuk menakut-nakutkan dan meresahkan orang yang ditanya. Soalan dan pertanyaan itu sendiri sudah merupakan hukuman dan penyeksaan kepadanya. Adapun ayat yang menafikan adanya pertanyaan pula bererti pertanyaan untuk mendapat ma'lumat.

Demikian juga dengan ayat di bawah ini:

فَإِذَا نُفِخَ فِي الصُّورِ فَلَا أَنْسَابَ بَيْنَهُمْ يَوْمَئِذٍ وَلَا يَتَسَاءَلُونَ ﴿٣٥﴾

Bermaksud: Apabila sangkakala ditiup, maka tidaklah ada lagi pertalian nasab di antara mereka pada hari itu, dan tidak pula sempat mereka bertanya-tanyaan. (al-Mu'minun:101).

Ia sekali pandang kelihatan bertentangan dengan firman Allah berikut:

يَوْمَ يَفِرُّ الْمَرْءُ مِنْ أَخِيهِ ﴿٣٤﴾ وَأُمِّهِ وَأَبِيهِ ﴿٣٥﴾ وَصَاحِبَتِهِ وَبَنِيهِ ﴿٣٦﴾

Bermaksud: Pada hari ketika manusia lari dari saudaranya (34) dari ibu dan bapanya (35) dari isteri dan anak-anaknya (36). ('Abasa:34-36).

Ayat-ayat dari Surah 'Abasa ini menunjukkan pada hari kiamat nanti pertalian nasab dan perhubungan kekeluargaan tetap ada, sedangkan ayat ke-101 Surah al-Mu'minun pula menafikannya. Memang pada zahirnya kelihatan bertentangan, tetapi kalau qaedah ke-39 ini dipakai, niscaya tidak akan kelihatan lagi pertentangan antaranya. Misalnya dikatakan begini, ayat-ayat yang mengisbatkan adanya pertalian nasab dan perhubungan kekeluargaan itu dipakai dengan ma'na sebenarnya. Sementara ayat ke-101 Surah al-Mu'minun yang menafikannya pula dipakai dengan erti pada hari itu tidak ada lagi manfa'at pertalian kerabat di antara mereka.